

Mr. sc. Božidar Milišić, dipl. inž. geod.



Božidar Milišić rođen je u Glavskoj kod Trebinja, 27. 2. 1929. godine. Osnovnu školu (četiri razreda) završio je u rodnom selu, a četiri razreda gimnazije u Trebinju. Nakon toga upisuje Geodetsku srednju tehničku školu u Sarajevu, na kojoj je maturirao 1952. godine. Odmah po završetku srednje škole zapošljava se u Geodetsku upravu BiH, gdje je radio na raznim stručnim operativnim zadacima, kao što su revizija katastra u Bileći (1952 – 1953), gradski premjer Konjica i obrada planova Mostara (1953 – 1954), premjer Brčkog (1954), obnova triangulacije u opštini Bosanska Gradiška (1955), razvijanje geodetske osnove u Bosanskom Novom, Bosanskoj Krupi, Ljubinj, Trebinju i Bileći (1956 – 1958). Godine 1958. postavljen je za rukovodioca Sekcije za premjer u Prijedoru, Geodetske uprave BiH. Uz rad je uspješno završio Višu geodetsku školu u Sarajevu, 5. 9. 1962. godine, i to kao prvi student koji je vanredno okončao studij. Od 1962. do 1965. godine radio je kao rukovodilac Radne jedinice za premjer u Prijedoru Geodetskog zavoda Sarajevo, a od 1966. do 1974. godine obavljao je funkciju rukovodioca Radne jedinice za premjer i osnovne radove Sarajevo, Geodetskog zavoda u Sarajevu. U tom periodu završava studij geodezije na Arhitektonsko-građevinsko-geodetskom fakultetu Univerziteta u Ljubljani, gdje je diplomirao 1970. godine. Od 1958. do 1974. godine rukovodio je mnogim geodetskim radovima širom BiH (npr. premjer opština Bosanski Brod, Prijedor, Travnik, Pale, Ključ, Glamoč, Tuzla itd.). Kao zanimljivost navedimo da se je samostalno riješio problem koji se pojavio pri obradi materijala tih premjera, vezan za uticaj razlike u deformaciji projekcije na pojedinim mjestima na određivanje površina. Njegova metoda se od tada neprestano koristila u praksi. U periodu od 1967. do 1968. godine projektovao je i organizovao radove te rukovodio najslabijim zadatkom novog premjera BiH – radilištem Sarajevo, na kojem je bilo angažovano oko stotinu geodetskih stručnjaka. U razdoblju od 1974. do 1982. godine bio je tehnički direktor Geodetskog zavoda u Sarajevu i rukovodio svim poslovima na premjeru brojnih opština širom BiH (Čapljina, Ljubuški, Neum, Nevesinje, Donji Vakuf, Trebinje, Prijedor, Zenica, Ilijaš, Bugojno, Cazin, Velika Kladuša, Gradačac, Srebrenik, Tešanj, Vareš, Vlasenica, Kakanj, Breza, Višegrad, Foča, Sanski Most, Živinice, Visoko i dr.). Za svako radilište je napisao detaljno tehničko uputstvo i način organizacije radova. Veliki doprinos je dao i u terenskim radovima na uspostavi katastra komunalnih uređaja u gradu Sarajevu, od 1976. do 1982. godine, kao i na prvim poslovima komasacije u BiH (Bijeljina, 1980 – 1982). Od 1982. do penzionisanja 1993. godine radio je u Republičkoj geodetskoj upravi BiH, na dužnosti načelnika za premjer. Tu se uglavnom posvećuje organizaciji premjera Republike i bavi se organizacijom finansiranja, tehničkim uslovima, kategorizacijom terena, izradom pravilnika, uputstava i instrukcija itd. Od 1997. do 2004. godine bio je direktor firme Georad u Trebinju.

Pored stručnog, bavio se i naučnim i akademskim radom. Postdiplomski studij je završio na Geodetskom fakultetu Sveučilišta u Zagrebu, odbranivši magistarski rad „Prilog istraživanju gradske poligonometrijske mreže mjerene elektronskim daljinomjerima“, 17. 4. 1978. godine. Objavio je 6 radova u časopisima i na konferencijama. Izabran je u zvanje docenta na Odsjeku za geodeziju Građevinskog fakulteta Univerziteta u Sarajevu 1986. godine, za predmet Viša geodezija I.

Bio je uspješan i u društvenim aktivnostima, gdje treba istaći njegov uspješni angažman u Savezima geodetskih inženjera i geometara BiH i Jugoslavije, u kojima je obavljao niz odgovornih dužnosti. Od 1973. do 1977. godine bio je predsjednik Saveza geodetskih inženjera i geometara BiH, a bio je i član Predsjedništva jugoslovenskog geodetskog saveza.

Za svoj veliki stručni i društveni doprinos dobio je niz priznanja: orden rada sa srebrenim vijencem, spomen plaketu grada Sarajeva, plaketu i povelju Saveza geodetskih inženjera i geometara BiH i Jugoslavije, nagradu Geodetskog zavoda u Sarajevu za inovacije u struci itd, Godine 1991. godine proglašen je počasnim članom Saveza geodetskih inženjera i geometara BiH.

Bio je oženjen sa Milevom Vejnović, a u braku su dobili dvoje djece, sina Vasu i kćer Tanju.

Preminuo je 2.3.2008. godine u Trebinju, gdje je i sahranjen na gradskom groblju.

S punim pravom se može tvrditi da je malo stručnjaka tako snažno, srčano, uporno i u kontinuitetu doprinosilo razvoju geodezije u Bosni i Hercegovini, kao što je to radio Božidar Milišić. Neka mu je vječna slava i hvala za sve što je učinio za našu struku.

Kemal Arnautović